

LETSATSI LA MAKGAOLAKGANG LA MAFELO A MOTSHEANONG LA HORE BENG BA MESEBETSI BA FANE KA DITSEBAHATSO TSA BONA LE ATOMETSE HAHOLO

PRETORIA, 24 Motsheanong 2019 – Beng ba mesebetsi ba hopotswa hore Ditsebahatso tsohle tsa Selemo ka seng tsa Tsepamiso ya Dibuka tsa Basebetsi (EMP501), Ditifikeiti tsa Basebetsi tsa Lekgetho [IRP5/IT3(a)s] le, moo ho hlokehang, Ditsebahatso tsa Setifikeiti sa Lekgetho tsa ho Hlakola Lekgetho (EMP601) tsa nako ya ho tloha ka la 1 Tlhakubele 2018 ho isa ho la 28 Hlakola 2019 di tlameha ho nyehelwa ho SARS ka la 31 Motsheanong 2019.

Ho bohlokwa hore beng ba mesebetsi ba nehelane ka ditsepamiso tsa selemo ka seng ba ipapisitse le letsatsi la makgaolakgang le hore ba nehe basebetsi ba bona ditifikeiti tsa IRP5/IT3(a). Tsena ke tsona ditifikeiti tse ka sehloohong tse hlokehang hore balefalekgetho ka bomong ba bona ba faele dikgutliso tsa bona tsa lekgetho la lekeno ka nako ya Sehla sa Lekgetho, se qalang ka la 1 Phupu 2019.

Ho na le tse leng ho EMP501 tse lokelang ho tsepama hore nyehelo ya tsepamiso e atlehe. Tsena ke:

- Ditsebahatso tsa kgwedi ka nngwe tsa Mongamosebetsi (EMP201s) tse bontshang dikgulo tsa Lekgetho-la-Lefa-ha-o-ntse-o-sebetsa (PAYE), Letlole la ho hloka mosebetsi (UIF) le Levi ya Ntshetsopele ya Boitsebelo (SDL);
- Ditefo tse entsweng (ho sa akaretswa ditefo tsa kotlo le tswala);
- Ditifikeiti tsa Mosebetsi tsa Lekgetho [IRP5/IT3(a)s] tse ntshitsweng; le
- Ditshebetso tsa palo tsa Lekgetho la Kgothatso ya Khiri, ebang ho hlokeha bakeng sa nako eo.

Ka ho kopa Setlankana sa Akhaonto ka mora ho etsa nyehelo ho eFiling, beng ba mesebetsi ba kgona ho boha sekoloto sefe kapa sefe se morao, dikgutliso tse morao le ditefo tse sokang di ajwa.

Ditsebahatso di ka nyehelwa ka tsela ya @syFile™ Employer kapa eFiling. Ha ho sa amohelwa diforomo tsa meputso tse tlatsitsweng ka letsoho. Beng ba mesebetsi ba kgothaletswa ho qoba tshubuhlellano ya metsotso ya ho qetela le ho netefatsa hore ho na le nako ya ditokiso, ebang ho hlokeha.

Dikhopi tsohle tsa ditsebahatso tse nyehetsweng di tlameha ho bolokwa bonnyane nako ya dilemo tse hlano.

Ka ha SARS e sebedisa lesedi le tsebahaditsweng ke beng ba mesebetsi ho kenya lesedi ka hara dikgutliso tsa lekgetho la lekeno tsa batho ka bomong ba bona, basebetsi ba hopotswa ho lekola lesedi le hlahellang ditifikeiting tsa bona tsa IRP5/IT3(a) mmoho le lesedi le kentsweng ditifikeiting tsa lekgetho ho tswa ditheong tsa mekga ya boraro e kang dikema tsa kalafo. Ebang lesedi le kgutlisong le fosahetse, mosebetsi o lokela ho ikopanya le mongamosebetsi wa hae kapa setheo sa mokga wa boraro hore lesedi leo le lokiswe.

Diwekshopo tsa SARS tse mabapi le thuto ka lekgetho mabapi le tsehebediso ya e@syFile™ le ditsebahatso tsa selemo ka seng tsa tsepamiso ya dibuka di fumaneha pele ho letsatsi lena la makgaolakgang makaleng a fapaneng ho phatlalla le naha. Dinako di fumaneha websaeteng ya SARS tlasa '[Useful tools_Learn about Tax](#)'.

Ho ka ikopanngwa le SARS Contact Centre ho 0800 00 7277 mme ditataiso tsa mokgwa oo o ka faelang ka ona di ka fumanwa websaeteng ya SARS tlasa karolo e buang ka [Dikgwebo le Beng ba Mesebetsi](#).